

Maktubu di dii min di Pol jangigi nare nɔ Tesalonik

Maktubu di ka dwari

Tesalonik i ciri min di geche di mana gi wama gi Maseduwannɔ sumdi. Nare nɔ dam Tesalonik da, naɔ i nare nɔ Girek, me Juwib kaw ilɔ me ca. Paja ginɔ Jesu duwa gi Pol day gi nɔ woni hára gandiɔw nɔ Silas day gi Timote waygi nare Nɔ di lade dinɔ Jesu Kris duwa lɔ pii me, nare naɔ kal dusirɔgi Jesu diwɔ. Nare naɔ dwaragi lɔ da, i nare nɔ gindɔgi i Juwib bɔdɔ. Me nare nɔ Juwib nɔ ginɔ dwaya gi gilɔ ginɔ Pol duwa bam ilɔ me ca. Cendi so gandiɔw gi gwale mwom da, nɔ Pol di sogi hargi kal Tesalonik di bam.

Al aliya sir mwom da, Pol giy Timote ba hana dwaynaw gwale ginɔ kretiye nɔ Tesalonik day (ch 3). Cwara duwa lɔ da, anɔgi wayiw Pol da, cendi ba dibi ilɔ dusi day di kala Mǎrɔyɔ di jang sin me, anɔgi cimiɔw gwale day gi cendi urɔw di daa me ca. I dara ta di me Pol jangi gi maktubu di ta di. Anɔgi alɔw Mǎrɔ dóche dara dusi di kala dinɔ nare nɔ Tesalonik day me dwani day di cendi al me ca (ch 1-3). Anɔgi gisigi me, waygi dara cwara ginɔ Jesu Kris duwa di, ba ha 'ya i man mo, me nare woni kala dusirɔgi diwɔ nɔ mare me nɔ dam bira me da, anɔgi ba ha alagɔ i man mo. Yande da, Pol waygi gwale gaba hilalagi dusirɔgi, ba gi ha hára pad dama gi Aba ciri gi Jesu Kris alɔ daa min (ch 4-5).

Labiya dinə Pol day

¹ İndi gi Pol me, Silas me, Timote me, nə jan-gangnin maktubu di ta di, 'yeni nare nənə Măĩ duwa nə dayar daa mana gi ciri di Tesalonik. Anə bamar daa gi Abirandi gi Măĩ min me, gi Aba ciri gi Jesu Kris min me ca. Kal Măĩ piynə biw didəngə me, 'yà nang hılala jwam me ca.

Pol àliw Măĩ dóche dara nare nə Tesalonik

² Nə àliwnin Măĩ dóche diban bwaa gi gwayni dara darang pad, me mana gi amsa ninnə kaw, nə niməngnin bam bədə me ca.

³ Abirandi gi Măĩ dirəwə da, dusirənin gunin daa daa dusi dan di kala di anə àl gandidi giyə di didə me, dwani dan di anə àl gi kwandang di me, ùrə dan gi anə ùrgi me, anə yi gi sidəng woy kal gi irmə dan min Aba ciri inda gi Jesu Kris cwara duwa diwə me ca.

⁴ Chamran, nə 'wocninin com dara Măĩ ùrəng naŋe me piyəng nim dara anə banə ina nare duwa me ca.

⁵ Nə way yande dara wála gi nə giranin dannə me nə wayangnin Nō di ladedinə Jesu Kris duwa me da, anə kal gi dusirəng Jesu diwə. Me dusi dan di kala Jesu diwə di, i dara gwale gi bidənin mira bədə, me i gi dwana dinə Măĩ duwa me, Dúndi waa dira gi wangə me. Nenin kaw, nə 'wocninin dara gwale gi ba nə wayiwnin di ba i gwale siw me ca. Me mani nə nə àlginin dwaŋəngə dara darang da, anə 'wocn com.

⁶ Me 'yeni da, anə u i mani nin nə àla me nənə Aba ciri duwa me. Mana gi gılə gi dirin gi naŋ

dalawə kaw, anə yi gwale ginə Mǎĩ duwa gi sii 'ywala gi Dúndi 'yàng gandiw.

⁷ I yande me caga da, 'yeni kaw, anə kidi nare nə gi yər mani nə lade sidəngə me, nare woni kala dusirəgi *Jesu Kris diwə* nə siŋa di Maseduwannə me di Akayyə me ugi àl gi giyə.

⁸ I dara 'yeni ɗanĩ me, nare nə dam wama gi Maseduwannə me nə dam wama gi Akayyə me, doy gi gwale ginə Aba ciri gi Jesu Kris duwa. I mana gi ciri di ta lə di mira me nare doy gi gwale di lə bədə, me dusi dan di kala da, nare way gwale dira siŋa lə pad, ùr dara ba nə waynanin nenin bá bədə.

⁹ Gi way gwale nin dara yəə gi anə yinin sidəngə wála gi nə 'wònin dannə me, anə giŋ domde dan bam me, anə co dirəng àliw Mǎĩ gi ɓag gaba dama gi dirəw giyə anju.

¹⁰ Anə dam bedi Jesu gi i Mǎĩ gorndiw di swaa daa cwara hára lə. I anji me Mǎĩ diməw daa muni lə anju. I anji me ha kɪdəndi daa sariya di hára lə targiŋ ib di lə anju.

2

Mani nə àla nənə Pol day mana gi ciri di Tesalonik

¹ 'Yeni nə chamranin, anə 'wocŋ com dara miɓəni nin di anə àlanin mana gi nə 'wònin nim dannə da, i pəgiŋ bədə.

² Anə 'wocŋ cadɪba gi gi cadɪbanin me giɓə gi gi giɓənin dirənin pii me mana gi ciri di gi 'wogidi Pilip di. Yande pad kaw, mana gi wamani gi

nañ ta di dalawə kaw, Mǎřĩ 'yànin abnani di idi wayang Nō duwa di lade di le com.

³ Ta di me berni di nə àsiginin nare dara ba kalna dusirəgi Jesu diwə da, nə wayginin i gwale gi kulagi bədə me, gwale gi àcne bədə me, nə lamnin i nare dara bwagi bam bədə me ca.

⁴ Me nə waynin i gwale gi Mǎřĩ ùr, dara i anji me girsinin yərnin ba nə nemninne, me 'yànin gi giyə duwa gaba waya gi Nō di lade di isiraninnə anju me ca. Nə kanjinin dara nare nə siña didə ka ba 'waginanin gi jilay cendi bədə, me nə ùrnin dara Mǎřĩ ba 'waginanin gi jilay, anju. I anji me yər irmə nin gi dusirənnə, anju.

⁵ 'Yeni da, anə 'wocñ com, dii min yande nə wayawnin gun gwale gaba lama mana bədə. Dii min yande, nə wayagin nare gwale gi lade dara lamagi nim 'woo gi mani isiragi lə bədə. I Mǎřĩ me 'wocñ dara gwale nin di, ba i gwale siw, anju.

⁶ Dii min nə kanjinin dara gun ba 'waginanin gi jilay anju bədə. 'Yeni kaw, anə ba nə 'waginanin gi jilay 'yeni bədə me, nare nə dāng kaw, ba 'waginanin gi jilay cendi bədə me ca.

⁷ Bag da, dee nə ha yibəngnin gi dwana ba anə àlnanin mani nə dirənin ùr, dara ba nə inin paja nənə Jesu Kris duwa. Me nə àlnin yande bədə. Mana gi nə damnin nim dwarengə da, nə àlnin mani gi dusi di hilale ya dine idəgi ba di gam gi dindadi ladi ta de.

⁸ Dusirənin di hilal gandang ta di me nə wayangnin gi Nō di lade dinə Mǎřĩ duwa mira bədə me, nə unin sidənin pad dee ina i made kaw, nə marninne dara ùrə gi nə ùrəngnin nañ

di me ca.

⁹ Chamranin, dusirəng gwong mana gi giyə nin gi nə àlwnin gi gwayni naŋ diwə bədə ba? Nə àlnin giyə gi dawa me gi changa me gi isiranin nin dara kalang gi noo didəngə bədə. I yande me nə wayangnin nim gi Nō di lade dinə Mǎĩ duwa di.

¹⁰ Giyə gi nə àlawnin mana gi dwaɾəngə 'yeni woni kala dusirəng Mǎĩ diwə ta di, nə àlawnin i gi dusi di lade di diban àcɲa me, gi mani nə àla nə tiba me ca. Dii min gun nem waya gwale day gi àcɲe bədə. 'Yeni me, Mǎĩ me, anə yər giyə nin gi dirəng.

¹¹ Anə 'wocɲ com: Mani nin nə nə àlnin dwaɾəngə gi gun bá bá da, nə àlnin i ya abe ba àlgi gi dindaw mani ta de me ca.

¹² Nə wayangnin gwale hurang gi abnani dusirəngə me, nə noginin gindəng daa me, nə amsangnin me, dara ba anə àlɲa mani nə lade nə 'yoliw Mǎĩ gaba 'wagang dara anə banə hana damna mana duwa gi 'yogde gi anji lam gi dwǎĩ lə di me ca.

Nare nə Tesalonik dusi day di kala Mǎĩ diwə me gilə day gi dirin me

¹³ Dang da, yarna dara na me nə hoynin gaba àlaw Mǎĩ dóche bədə. I dara wála gi nə wayangnin gwale ginə Mǎĩ duwa da, anə doy me anə yiw dusirəngə ya ba i gwale gi pəgin gi nare day de bədə. Anə yiw ya ba i gwale gi swaa daa Mǎĩ siwə de. Me i sidi, gwale gi ta di swaa i daa Mǎĩ siwə 'yang, me 'yeni woni

kala dusirəng Jesu diwə da, gwale gi ta di àl giyè dusirəngə.

¹⁴ Chamranin, mani nə àl nare nənə Mǎĩ duwa nə dayar daa mana gi Jesu Kris gindiwə nə dam mana gi sɪ̃na di Judeyè da, yala àlang 'yeni me ca. 'Yeni kaw, i chamrang dan gang me giləng dirəng cendi, ya nare nə Juwib ba gi gilgi gi chamrandi nə Jude dirəgi de me ca.

¹⁵ I cendi nə ka ta di me 'yè Aba ciri gi Jesu me, 'yè nare woni cimə Mǎĩ biw me, i cendi me gıl̃nin dirənin me ca. Nare nə ta di àl mani nə 'yoliw Mǎĩ bədə me, cendi yi maṛande gi nare pad me ca.

¹⁶ Cendi im̃nin wayagi gi nare nə i Juwib bədə gwale gaba 'yàgi bilə di bam. Cendi àl mani nə àc̃ne lə diiyə diiyə, bɪraa Mǎĩ dusiw so didəgi lə me, sariya di geche ha yibəgi le me ca.

Pol irim ba cor ha yara nare nə Tesalonik

¹⁷ Chamranin, nenin da, sidənin da, nə ilənin dwaṛangə bədə gaba wála ɓani ma me da, dusirənin da, ilə gandang. Iṛi nə ilənin jara lə dara ba nə cwaranin hára dwaṛangə bi, dara dirənin ùr naṇe.

¹⁸ Nə ùrnin ba nə cwaranin hára 'ywange bi. İndi gi Pol da, nə kañji birmə dɪn giṛə naṇe ba nə hára yarange me, Sidan im̃in bam.

¹⁹ I 'yeni me anə i nare nə nə irim̃nin didəngə me, anə i sii 'ywala nin me, anə i ya mani nə lade naṇ nə gi 'yogiw gi gun gaba wála gidi naṇ gwayni duwa ta de. Wála gi Aba ciri gi Jesu Kris cwara duwa lə da, sidənin ha 'ywalanin didəngə.

²⁰ I sidi 'yang, i dara 'yeni di me, nə 'yonin gi sumi gi 'waga me sii 'ywala me ca.

3

¹ Yande da, nə nyamanin dama byada bədə, nə unin bidenin nə damnin minanin mana gi ciri di gi 'wogidi Aten

² me, ba nə giyəngnin Timote. Timote di, i chandirandi gaba waninnə àla gi giyə ginə Mǎĩ duwa gaba waya Nō di lade dinə Kris duwa me. Nə giywnin dara anju ba hana 'yàng dwana me, hurnang abnani dusirəng di kala lə me ca.

³ Nə àlnin yande dara gun min tenene dwaɾəngə wamani gi 'ywang ta di da, cwanaw targiɲ bədə. Anə 'wocɲ com dara wamani gi ya ta de di da, i Mǎĩ me ùr anju ba àlnandi.

⁴ Dara wála gi nə waranin lə sidəngə siɲ da, nə wayangnin giłə gi diriɲ gi ya ta de di ba ha hára 'ywandí le. Anə 'wocɲ com dara i anji me ba yala.

⁵ Əw, nə way i dara ta di me, nə nyama dama byada bədə. Nə giyəng Timote dara ba hana yarna dusi dan di kala Mǎĩ diwə di. Nə lánɲ dara Sidan ha girsəng me, giyə nin gi nə àlwnin gi gwayni di bwananin sidənin bam pəgiɲ bədə.

⁶ Me caga da, Timote swaa sidəngə yala waynin gwale dan gi 'yole ginə dusi dan di kala Mǎĩ diwə di me, ùrə gi anə ùr sidəng me ca. Anji waynin da, 'yeni kaw, anə banə irim didəninne naɲe, cende nin ba àlang naɲe ya cende dan ba àlnin nim ta de me ca.

⁷ Chamranin, i ta di me nə jibanin nan̄ dara gi gıl̄nin dir̄ənin kaw, nə yinin sid̄ənin woȳ dara dusir̄əng di an̄ə kaldi Mǎĩ̄ diwə jang di.

⁸ Caga da, nə damnin lə daa gi dir̄ənin bira dara an̄ə dam bamar gi Aba ciri gi Jesu min̄ jang siñ.

⁹ Dara darang 'yeni me nə 'yonin gi sii 'ywala gi geche Mǎĩ̄ dir̄əwə! I dóche na me, nə ha əlawnin Mǎĩ̄ darang mo?

¹⁰ I dara ta di me, gi dawa me gi changa me, nə amsinin Mǎĩ̄ gi dwana ba kalnanin birmə ba nə hanin 'ywang gisəng dara dusir̄əng di kala diwə ba hana nim gi dir̄ədi pii pii.

¹¹ Dara kal Abir̄andi gi Mǎĩ̄ gi siw duwa gang me, Aba ciri inda gi Jesu Kris me, dāngr̄inanin birmə hana dimnə sid̄əngə bá.

¹² 'Yeni da, kal Aba ciri gi Jesu gıl̄nəng birmə gaba ùrə sid̄əng d̄waya bam pad, ùrə gi kwan-dang nə dāng me, ya nenin kaw, ba nə əlnin nim gandang de me ca.

¹³ Ya ta de me, Aba ciri ha 'yàng dwana dara ba an̄ə kid̄inə nare nə dusir̄əgi wusi her nə gun nem bwang gwale did̄əngə bədə Abir̄andi gi Mǎĩ̄ dir̄əwə, wála gi Aba ciri inda gi Jesu Kris cwarne hane gi paja duwa nə daa. Amen.

4

Ala gi mani nə Mǎĩ̄ ùrgi

¹ Caga da, chamranin, mani gindəgi nə wor da, nə amsangnin me, nə hurangnin abnani dusir̄əngə me gi Aba ciri gi Jesu Kris sumiw. Anə 'woo gılə nin gi nə gıləngnin di, ba i man me, anə

ha àla mani nə 'yoliw aba ciri gi Mǎĩ di mo? Caga kaw, anə àl mani nə ta di le dīm. Me àlna mani di dwayna nə pii bam.

² Dara anə 'wocɲ com, i gisəni gi Jesu Kris gisənin di me, nə gisəngnin nim me ca.

³ Mani nə Mǎĩ ùrgi sidəngə da, ùr dara ba anə ina i nare duwa nə dusirəgi wusi me, anə banə àlna àcɲa gi gichini bədə me ca.

⁴ Dwaɽəngə da, kal wi kaw yarna deme min unə me, damna gi birmə gi tiba Mǎĩ dirəwə me, nare àsinagi nim gi sumi gi 'waga didəgi lə me ca.

⁵ Kal irmə gi àcɲe gi dusirəngə dwayna didəng bam bədə. I nare woni 'wacɲa Mǎĩ gi ɓag bədə me àl yande cendi.

⁶ Kal gun kaɲjina jaw dyaməw bədə me, deme kaw, kaɲjina kondidi tirədi bədə me. Dara Aba ciri gi Mǎĩ da, ùr mani nə ta di bədə. Nare woni àla àcɲa gi ya ta de da, Aba ciri gi Mǎĩ ha bwagi gwale didəgi lə yibəgi nimme. Nə wayangnin gwale gi ta di pii dīm me, nə cornin wayang dāng bi.

⁷ Dara Mǎĩ di 'wagandi dara ba də àlnang àcɲa gi gichini bədə. Anji 'wogindi dara ba də damnang gi dusi di wuse her.

⁸ Yande da, gun gi giɲinə gisəni nin bam da, giɲ i gisəni giɲə gun duwa bədə me, giɲ i gisəni giɲə Mǎĩ gaba 'yàng Dúndi duwa di wuse di bam.

⁹ Gwale giɲə ùrə gi sidəng, 'yeni nare nənə Kris duwa da, ùr dara ba nə janginangnin maktubu ba bədə. Dara i Mǎĩ di me giləng dara ba anə ùrnə sidəng di le, anju.

¹⁰ Caga da, kaw, anə ùr sidəng di le dīm gi chamrang nə dam mana gi siŋa di Maseduwan lə pad. Yande da, nə wayangnin, àlɲa dwani di dʒwayna di pii bam.

¹¹ Kanjina birmə dara dama gi hɪlala jwam nare dwaɾagi lə me, ɪrmɪnə mani dan nə àla didəgi lə mira me, àlɲa giyə gi isirang dan ya ba nə wayangnin nɪm pii de.

¹² Yande do me, nare nə iche kaw ha àlang horimbə me, anə ha dama kalaw gun noo diwə bədə me ca.

Cwara ginə Aba ciri gi Jesu duwa me nare nə mare dīmə day gi daa muni lə me

¹³ Chamranin, nə ùrnin dara anə banə 'wacɲana gwale siw gi ɪrim dara nare nə mare di. Dara kal dirəng àlɲa ɲagini naɲ ya nare nə dʒang nə kal ɪrmə day Mǎɽi diwə bədə de di dī.

¹⁴ Də kalnang dusirəndi dara Jesu ba mar me, ba gandi daa muni lə me. Yande da, də kalang dusirəndi dara Mǎɽi ba ha dīmə nare woni kala dusirəgi Jesu diwə me mar nɪm di daa muni lə dara hára dama gi Jesu mɪn me ca.

¹⁵ Dwayna gwale gi Aba ciri gi Jesu gilgi gandiw nare di me, nə wayangnin gandiw. Wála gi Aba ciri gi Jesu cwarnay da, nendi nə də warang bɪra da, də ha hára nare nə mare dirəgi lə pii bədə.

¹⁶ Wála gi ta lə da, Jesu ha 'woo biw waya gwale me, Paja nə daa nənə Mǎɽi duwa geche day marɪjaw ha nɪmə me, pɪdim dɪnə Mǎɽi duwa ha nɪmə me ca. Mwom da, Jesu di gi siw duwa ha swaa daa chéə hára lə me, nare nə mar gi

Jesu Kris sumiw da, ha dimə daa muni lə, cendi pii do.

¹⁷ Targiŋ d̄ang da, nendi nə də warang b̄ira da, M̄āŋi ha layandi bamandi gi nare nə mare di min, h̄ara ganandi daa siyaya dalawə, dara sawa gi Aba ciri gi Jesu di dirəw daa. Mana gi ta lə da, də h̄arang dama gandiw gi diriŋ b̄iŋi.

¹⁸ Yande da, gwale gi anə dwayaw ta di pad da, wi kaw, hurnaw jaw abnani dusiwə dusiwə.

5

¹ Chamranin, gwale gi irim dara mani nə ta di, w̄ala day me dawa day di cendi ha àlala lə me da, ùr dara ba nə janginangnin gwale day maktubu lə bədə.

² 'Yeni gang kaw, anə 'wocŋ com dara w̄ala ginə Aba ciri duwa di ha dimə didəndi lə jisgi ya mē de gi changa dwaŋi.

³ W̄ala gi nare ha waya da: «Caga ka da, mana h̄ilal le d̄im me, də damang i labiya pəgiŋ» mwom da, w̄ala gi ta lə dog, mani nə wome woni myanda nare ha dimə didəgi lə ya wamani gi ȳaa ba àl gi deme ta de. W̄ala gi ta lə da, gun min ha biyə siw bam dwaliŋyə bədə.

⁴ Dim da, chamranin, 'yeni da, anə i nare nə anə dam dilimmə bədə. Yande da, w̄ala gi ta di ha dimə didəngə ya mē de bədə.

⁵ Dara 'yeni pad dannə, anə dam i mana gi ácneyə me, anə àl mani dan daa dawa dirədi lə d̄əŋ me ca. Nendi da, də 'yang i nare nənə changa dira bədə me, dilim dira bədə me ca.

⁶ Yande da, inandi nuni ya nare nə ɗang de bəðə. Damnandi dirəndi bira me, damnandi dirəndi pəgiɲ pirang me ca.

⁷ Nare woni 'ya nuni da, cendi i i gi changa me, woni widibə gani kaw, cendi widibi i gi changa me ca.

⁸ Dim da, nendi nə də damang mana gi waleyə da, damnandi dirəndi pəgiɲ pirang. Kalnandi dusirəndi Mǎĩ diwə me, ùrnəndi sidəndi me, dara dusi inda di kala Mǎĩ diwə me, ùrə inda gi sidəndi me da, wun ya gare gi ɗore gaba jara say de. Me kala gi irmə bilə diwə da, wun ya jagiwa di idi say di gun ibi diwə de me ca.

⁹ Mǎĩ 'wagandi dara àla ganandi sariya bəðə me, i dara 'yàndi bilə gi Aba ciri inda gi Jesu Kris sumiw.

¹⁰ Jesu Kris di gira mar dara darandi, ba də damnang i dirəndi bira labaa, ba də marnang le kaw, ba də hanang damna gandi.

¹¹ I dara ta di me, wi wi kaw, hurnaw jaw abnani dusiwə me, wanaw jaw lə dara dusi dan di kala di jwarna hana pii pii, ya anə àlgi nim de ɗim.

Gisəni

¹² Chamranin, nə amsangnin dara anə banə àlnagi nare woni ɗibə dirəngə giləng gwale ginə Mǎĩ duwa horimbə. Nare woni ɗibə dirəngə gisəng me, ɗangrang me ta di, i Aba ciri gi Mǎĩ me 'yàgi dwana, anju.

¹³ Yinəgi gi dwani nan me, bwanagi sidəgi lə dara giyə day gi cendi àliw di me. Damna me kal hilala jwam ina lə dwaɗangə me ca.

¹⁴ Chamranin, nə wayangnin: Nare nə àl mani gi birmə day bədə da, waynagi le me, nə dwana day ilə bədə da, wanagi lə me. Kal wi wi kaw, unəw jaw diw bam me ca.

¹⁵ Dwayna, gun gi jaw àlnaw àcna da, kal a cwarna àlnaw àcna me bədə. Gi wála wála, àlna mani nə lade dwaṙangə 'yeni me gi nare pad me ca.

¹⁶ Kal sidəng 'ywalnange gi wála wála.

¹⁷ Amsina Mǎĩ diban bwaa gi gwayni.

¹⁸ Ina i mani nə we weyə kaw, àlnaw Mǎĩ dóche. Ta di me i mani nə anji ùrgi dara nare nənə Jesu Kris duwa ba àlnagi di.

¹⁹ Kalna imədi dúndi dinə Mǎĩ duwa birmə gaba àla giyə dīra bam dī.

²⁰ Gun gaba cimə Mǎĩ biw wayna gwale da, kalna àla gwale duwa dī ichiñ dī.

²¹ Kanjina gwale di gindiw yarna le do me, gi lade da, unəw àlna gi giyə.

²² Mani nə we we nə lamnang dara bwang àla gi àcna lə da, gamna sidənge.

Amsa gi Mǎĩ ginə Pol duwa me labiya duwa me

²³ Kal Mǎĩ gaba hīlala jwam di gi siw duwa kidinəng nare nə dusirəgi wusibi her her me, gamna doni dan me, irmə dan me, dúndirəng me ca, dara wála gi Jesu Kris cwara duwa lə da, gun ha àsang gwale didəngə bədə.

²⁴ Aba 'wagang di i gun gi irmə duwa i min. I anji me ha àla mani nə ta di, anju.

²⁵ Chamranin, 'yeni kaw, amsina Mǎĩ dara daranin me ca.

²⁶ Alnagi chamrandi pad labiya nan me, yinə isiragi gi isirang sir àlnagi gi labiya.

²⁷ Nə amsangnin gi Aba ciri sumiw, maktubu di ta di, āsinadi daa chamrang dirəgi lə pad kalgi gi dwayna.

²⁸ Kal Aba ciri ında gi Jesu Kris piynə biw didəngə.

Maktubu dīnə Mǎĩ duwa
Somrai: Magtubu dənê Mǎĩ (New Testament+)

copyright © 2024 Wycliffe Bible Translators, Inc.

Language: (Somrai)

Contributor: Wycliffe Bible Translators, Inc.

All rights reserved.

2025-07-03

PDF generated using Haiola and XeLaTeX on 3 Jul 2025 from source files
dated 3 Jul 2025

709a9ed4-78c1-5393-bf98-819ac0f1bbbc